



## Yesu Alipanda Mbegu za

### Neno la Uzima

**I**meandikwa, Mtu hataishi kwa mkate tu, ila kwa kila neno litokalo katika kinywa cha Mungu.—**Mathayo 4:4.**

Masomo ya mafundisho ya Yesu na ya mahubiri Yake yalikuwa Neno la Mungu. Alipambana na waliomwuliza maswali kwa neno la wazi, “Imeandikwa.” “Maandiko yasemaje?” “Wasomaje?” Katika kila fursa, wakati shauku ilipoamshwa na rafiki ama adui, Alipanda mbegu ya Neno. Yeye ambaye ni Njia, Kweli na Uzima, Yeye mwenyewe Neno lililo hai, anaelekeza katika Maandiko, akisema, “na hayo ndiyo yanayonishuhudia”....

Watumishi wa Kristo wanapaswa kufanya kazi ile ile. Katika siku zetu, kama ilivyokuwa siku za kale, kweli muhimu za Neno la Mungu zinawekwa kando na badala yake zinawekwa nadharia za wanadamu na fikira zao. Wengi wanaojidai kuwa wachungaji wa injili hawaikubali Biblia nzima kama Neno lililovuviwa. Mwenye hekima mmoja huikataa sehemu moja, na mwingine huionea mashaka sehemu nyingine. Huweka maamuzi yao kuwa ni bora kuliko neno, na Maandiko wanayoyafundisha yanategemea mamlaka yao wenyewe. Ukweli wake mtakatifu unaharibiwa. Hivyo mbegu za ukafiri zinapandwa na kutawanywa popote; kwa sababu hiyo watu wanachanganyikiwa na hawajui waamini lipi.

Kuna imani nyingi ambazo mawazo hayapaswi kuziridhia. Wakati wa Kristo, Marabi waliweka kwa nguvu ubunifu usiofafanuliwa juu ya sehemu nyingi za maandiko. Kwa sababu mafundisho Dhahiri ya Neno la Mungu yaliwahukumu tabia zao, walijaribu kuharibu nguvu yake. Mambo yale yale yanafanywa leo. Neno la Mungu limefanywa lionekane fumbo na lenye kutatiza ili kutoa udhuru wa kuvunja sheria yake. Kristo alikemea desturi hizo katika siku zake. Alifundisha kwamba Neno la Mungu lilipaswa lieleweke kwa watu wote. Alisonda kidole chake kwa maandiko kuwa yenye uwezo usioweza kukanushwa, kadhalika na sisi yatupasa kufanya vivyo hivyo. Biblia lazima ifundishwe kama Neno la Mungu mwenyezi, kama mwisho wa mapambano yote, na kuwa ni msingi wa imani zote.

Biblia imepata kunyang'anywa uwezo wake, na matokeo yake huonekana katika kushushwa kwa hali ya maisha ya kiroho.... Wako wengi wanaomlilia Mungu aliye hai, wakiwa na hamu ya kuwako kwa Mungu.

Dhamira kuu ya Kristo ilikuwa ni huruma ya Baba na neema tele za Mungu; Alifikiria sana juu ya utakatifu wa tabia Yake na sheria Yake; Alijieleza Yeye mwenyewe kwa watu kama, Njia, Kweli na Uzima. Hebu hiyo ndiyo iwe dhamira ya watumishi wa Yesu. Wakilisha ukweli kama ulivyo katika Yesu. Fanya matakwa ya sheria na injili yawe dhahiri. Waambie watu juu ya maisha ya Kristo ya kujitoka kafara na kujikana nafsi juu ya unyenyekevu Wake na kifo, juu ya ufufuo Wake na kupaa Kwake mbinguni, juu ya kutuombea Kwake katika hekalu la Mungu mbinguni na juu ya ahadi Yake; “Nitakuja tena, niwakaribisheni kwangu” (Yohana 14:3) (Lulu za Uzima, uk. 16–18).